

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“E teie nei, o te amu i teie nei pane e o te inu i te au'a a te Fatu nei ma te au ore ra, e hara ia i te tino e te toto o te Fatu. 28 E hi'opoa maite râ te taata ia'na iho, a amu ai oia i taua pane ra, a inu ai oia i taua au'a ra. 29 O tei amu hoi e o tei inu ma te au ore ra, ua amu ia e ua inu i te pohe no'na iho, oia aore i hi'o i te tino o te Fatu ra. 30 No reira i rahi ai te pohe ma'i e te paruparu i roto ia outou na, e i taoto ai hoi e tahi pae.” Korinetia I, 11: 27-30.

Nu. 13.

Atopa, 1912.

Mat. 5.

Te Amuraa Maa a te Fatu.

I TE faatupuraa i teie nei oroa, ta te Faaora i faatupu i mua iti a'e i to'na poheraa, ua faaorehia i reira te hoê peu tahito roa, oia hoi te pûpûraa-tusia, o tei haapaohia mai ia Adamu mai â. Mai te tau o Adamu, e tae roa i te poheraa o te Mesia, ua vai teie nei oroa i roto i te hoho'a o te pûpûraa-tusia, e e tapao hoi te reira no te taraehara a te Mesia.

Ua monohia te ture o te pûpûraa-tusia e teie nei oroa, oia hoi, Te Amuraa Maa a te Fatu, e ua riro teie nei oroa apî, ei haamana'oraa i te taraehara a te Mesia. Na roto i te tusia, ua hi'o maite te mau nunaa tahito i mua i te taraehara a te Mesia ra, e na roto i te amuraa i te maa a te Fatu nei, te faaite atoa nei tatou i te poheraa o te Fatu ma te haamana'o i to'na mamae rahi, e no reira ua ite tatou te faatano nei teie nei na ture e piti i te taraehararaa.

I muri iho i to Adamu huriraahia i rapae au i te ô i

Edene, ua faaue mai te Atua ia Adamu ia pûpû oia i te tusia ma te i'oa o te Tamaiti Fanau Tahî, ei taipe no te tarae-hara ra a te Mesia. Ua haapiihia Adamu ia faaroo i te i'oa o te Tamaiti Fanau Tahî, e ia tatarahapa i ta'na ihora mau hara, e ia fanau i te pape e te Varua Maitai; o te ravea ia e ora'i te taata'toa ra. (Buka, "Poe Tao'a Rahi.") Ia pûpûhia te mau tusia ma te i'oa o te Faaora e tia'i, e ua faaite-papu-atoa-hia maira te huru o te mau mea e pûpûhia'i ei tusia, e te ravea hoi ia hopoihia ratou ra. E haamana'o maite tatou i teie, aore roa e nehenehe ia faahuru-ê-hia te ravea no te hopoiraa i te tusia, e aore râ ia pûpûhia te hoê mea aore i faaitehia. Te mau mea ia pûpûhia o te mau fanau'a matamua o to ratou mau nănă. (Buka, Poe Tao'a Rahi.) A hi'o atoa i Genese 4: 4, 5: "E ua hopoi atoa hoi Abela i te hoê mamoe maitai e te poria no roto i te nănă ra; ite maira Iehova ia Abela e ta'na ô; area o Kaina e ta'na ô, aore ia oia i ite mai. Riri roa a'era Kaina, e tuatua'tura ta'na mata."

Ia pûpû o Kaina i ta'na ô, ua pûpû oia i te mea ta'na iho i mana'o ma te haapao ore i ta te Atua i faaue maira. Ahiri ua pûpû o Kaina i ta'na ô ma te tia, e ma te haapao maite i tei faauehia, e iteahia maira ta'na ô ta'na i hopoi; no te haapao ore râ i faahapahia mai ai oia ra. O te haamataraa teie no te hopoiraa i te tusia, e ua tamauhia teie ture ma te tuutuu ore e tae roa i te poheraa o te Mesia.

Ua haapao atoa te ati Nephi i taua ture ra, a tere ai ratou i roto i te medebara. A hi'o i Nephi I, 7:22: "E ua tae atura matou i raro i te tiahapa o to matou metua. E ia tae atura vau, e to'u na tuaana, e te fetii atoa o Isemaela, i te tiahapa o to'u metua, ua haamaitai atura ratou i te Fatu, i to ratou Atua, e ua faatusia ratou i te tusia e te tusia ta-auahi ia'na ra."

Ua haapao atoa ratou i taua ture ra i to ratou fenua i parauhia, oia hoi, i te fenua ra i Amerika. Mai ta Adamu ma e te mau patereareha i haapao i te ture o te tusia, oia

atoa to Iseraela i haapao i taua ture ra, ma te hi'o atea mai ra i te poheraa o te Fatu. Ua haapao te ati Nephi i te ture a Mose, eiaha ma te mana'o e, no reira mai te ora. A hi'o i Nephi II, 25: 24-26: "Faaroo noâ tatou i te Mesia, te haapao nei â hoi tatou i te ture a Mose i te hi'o-maite-raa i mua i te Mesia ra, i te faatiaraa i te ture ra. 25 E no reira hoi i tuuhia mai ai te ture ra; ua riro ia te ture ei mea pohe ia tatou, e ua faaorahia tatou i te Mesia ra na roto i to tatou faaroo: area, no te mau faaueraa, e haapao ai tatou i te ture ra. 26 Te paraparau nei tatou i te Mesia, e te oaoa nei tatou i te Mesia, e te a'o nei tatou i te parau a te Mesia, e te tohu nei hoi tatou i te Mesia, e te papai nei hoi tatou i ta tatou mau tohu, ia ite ta tatou mau tamarîi i te tumu e hi'ohia'tu e ratou no te matararaa i ta ratou mau hara." Aore te matararaa i te hara i noaa na roto i te pûpûraa i te tusia.

I te rui i haavarehia mai ai te Fatu, ua parahi oia e te mau aposetolo tino ahuru ma piti i te amuraa maa ra, e ua parau atura oia ia ratou, "Hinaaro rahi roa to'u i te amu i teie nei pasa, o vau e outou atoa, a pohe atu ai au, 16 e faaite atu hoi au ia outou, E ore roa vau e amu faahou i te tahi e ia tupu noa'tu i te basileia o te Atua. 17 Ua rave ihora oia i te au'a, haamaitai atura i te Atua, na ô atura, A rave mai i teie a tufa na outou." Luka 22: 15-17.

Mea rau te huru o te tatararaa ta te mau taata i tuu i nia i teie na irava i taiohia na. Ia parauhia taua na irava e te Fatu, ua papu roa te auraa o taua oroa ra, ta'na i faa-tupu. Ua vai papu â te auraa o taua oroa ra, e tae roa i te poheraa o te mau aposetolo i uruhia e te Varua Maitai. A pohe ratou, ei reira ua ô mai ai te fabula. E i te reira tau, ua mana'o te feia faahua paari e, e tapao ia no to ratou paari, ia tuu ratou i te hoê mau faaauraa hohonu e te maere i nia i te mau parau papu o te Evanelia, e aita i maoro roa ua ruri-ê-hia tei haapaohia ra, e ua haapi'ohia te faufaa haapao-tamau-hia ra.

Na roto i te parau iho ta te Fatu, e ta'na mau aposetolo

i parau maira, ua ite tatou e, ua haamauhia teie nei oroa o te Fatu, ia roaa i te Feia Mo'a te tahi mau haamaitairaa varua, e ia haafatata Ia'na, o tei hoo ia ratou i to'na toto, e ia faaapîhia to ratou mau opuaraa ia haapao i ta'na parau. Na te pure haamaitairaa oroa, i heheuhia mai i teie anotau, i haapapu mai i te auraa mau o te oroa, te na ô maira te taioraa o taua pure ra:

“E te Atua, te Metua mure ore, te ani atu nei matou ia oe na roto i te i'oa o to Tamaiti o Iesu Mesia, e haamaitai mai e e haamo'a mai i teie nei pane na te mau varua atoa o te rave mai nei, ia amu ratou i te reira ma te haamana'o i te tino o to Tamaiti ra, e ia faaite ratou ia oe, e te Atua te Metua mure ore, e tia ia ratou i te rave i te i'oa o to Tamaiti i nia iho ia ratou, e i te haamana'o â ia'na e a muri noa'tu, ma te haapao maitai i ta'na ra mau faaue ta'na i tuu mai ia ratou ra, ia vai noa to'na Varua i roto ia ratou e a muri noa'tu. Amene.” B. F., 20: 27. B. a M., Moroni 4: 3.

No reira ia rave te hoê taata i teie nei oroa, te faaite nei oia e, te haamana'o ra oia i te tino i ofatihia, e te toto i haamanihia no tatou, e te faaite atoa nei oia e, e tia ia'na i te rave i te i'oa o te Tamaiti i nia iho ia'na, ma te farii noa i te mau hamani-ino-raa e te mau peapea e iri mai ia'na no taua i'oa mo'a ra. Te faaite atoa nei taua taata ra o te rave i te oroa e, e haapao maite oia i te mau faaue i tuuhia mai, e te titau nei hoi oia ia faaarataihia oia e te Varua Maitai.

Ia taio tatou i te mau hororaa no teie nei oroa, aita roa tatou i ite i te hoê parau o tei faaite mai e, no te matararaa hara teie nei oroa, noa'tu i te reira te haapii nei te mau haapaoraa êê e rave rahi e, no te matararaa hara teie nei oroa. Oia mau anei no te matararaa i te hara teie nei oroa? Aita roa'tu! Ua opani-roa-hia te feia rave hara, eiaha ratou e amu i te oroa. Te na ô maira Paulo i roto i ta'na episetole i te Feia Mo'a i Korinetia: “E teie nei o tei amu i teie nei pane e o te inu i te au'a a te Fatu nei ma te au ore ra, e hara ia i te tino e toto o te Fatu. 28 E hi'opoa maite râ te taata

ia'na iho, a amu ai oia i taua pane ra, a inu ai i taua au'a ra.
 29 O tei amu hoi e o tei inu ma te au ore ra, ua amu ia e ua
 inu i te pohe no'na iho, oia aore i hi'o i te tino o te Fatu ra.
 30 No reira i rahi ai te pohe ma'i e te paruparu i roto ia
 outou na, e i taoto ai hoi e tahi pae." Kor. I, 11: 27-30.

Ua au roa teie parau, ta Paulo i haapii i to Korinetia, i
 ta te Fatu i haapii i te ati Nephi, i te na ô ra mai e: "E
 teie nei, inaha, tera te faaue ta'u e horoa'tu ia outou, eiaha
 outou e faatia ma te ite i te taata ia rave i tau tino e tau
 toto ma te au ore, a opere ai outou i te reira; 29 O te amu
 hoi, e o te inu i tau tino e tau toto ma te au ore ra, ua amu
 ia e ua inu i te pohe no to'na varua; no reira, te ite ra outou
 aore e au te hoê taata ia amu e ia inu i tau tino e tau toto ra,
 e faaore outou ia'na." B. a M., Nephi III 18: 28, 29.

Ua au roa atoa teie na irava, ta tatou i taio na, i te
 parau i heheuhia i teie nei anotau hopea. Te na ô mai nei
 te parau: "Ei maa taime huru au te faataahia na te mau
 peresibutero e te mau tahu'a ei tatararaa atu ia ratou i te
 mau mea atoa no te ekalesia a te Mesia ia ite ratou, i mua
 atu i to ratou amuraa i te oroa, e i to ratou tamau-raa-hia
 na roto i te tuuraa rima a te mau peresibutero; ia au maitai
 te rave-raa-hia te mau mea atoa. Ia faaite te mau melo i
 mua i te ekalesia, e i mua i te mau peresibutero, na roto i
 te haerea au i te Atua, e te parau-tia, e te au ra te reira ia
 ratou, ia au te ohipa e te faaroo i tei faaitehia i roto i te mau
 parau mo'a i papaihia, mai te haerea mo'a i mua i te Fatu."
 Buka Fafau 20: 68, 69.

"Ua faaue-atoa-hia outou eiaha ia hurihia te hoê taata
 no te ekalesia, i ta outou mau faatiaraa oroa; teie râ, mai te
 mea ua hapa te hoê, eiaha noa atu ia oia ia amu e tae noa'tu
 i to'na faatupuraa i te hau." B. F. 46: 4.

O te baptizoraa no te matararaa hara ia, e "te taata o
 tei ore i baptizohia e ore oia e ô i te basileia o te Atua"; te
 na ô atoa maira te Fatu e: "Ia ore outou ia amu i te tino o
 te Tamaiti a te taata nei, e ia ore hoi ia inu i to'na toto, aore

ia e ora i roto ia outou.” Ioane 6: 53. No reira te taata o tei baptizohia, e o te ore e amu i te oroa o te Fatu no te mea aore oia i tiamâ, ua faarirohia ia e mea faufaa ore to’na baptizo-raa-hia.

Ua haapeapeahia te mana’o o te tahi pae taata i te mana’o e, nafea te pinepine o te haapaoraa i te Amuraa Maa a te Fatu. Te rave noa ra te tahi pae taata i te mau mahana’toa; e e toru faatiaraa ta te tahi mau taata i te mahana hoê. Te rave ra te tahi pae i te mau Sabati atoa, e te rave te tahi pae i te Sabati matamua ana’e o te avae ra. Hoê roa ta te tahi pae faatiaraa i te matahiti hoê ra, e e toru ta te tahi pae faatiaraa i te matahiti hoê. Te vai atoa ra te tahi mau haapaoraa o te ore roa e haapao i te oroa o te Fatu ra.

Ia haamana’ohia te tumu i faatumuhia’i te oroa o te Fatu, ei reira e iteahia, e mea au roa ia amu-pinepine-hia taua oroa ra. E tia anei ia pure pinepine i te Atua? Te pahono nei tatou, E; e mea tia roa; e ia pure tatou ma te tuutuu ore e tia’i. E tia anei ia tairuru pinepine te feia faaroo ma te haamori i te Atua? E, e mea tia roa ia te reira. E tia anei ia haamana’o pinepine Ia’na o tei pohe no tatou? E, e mea tia roa, e mai tei au i ta te Fatu iho i haapii mai, o te oroa nei ia e mana’oraa ia’na. Ia ite tatou i teie nei mau mea, eaha e ore ai tatou e amu pinepine i te oroa nei ma te haamana’o maite i te poheraa o to tatou Faaora.

Ua mau papu te mau pîpî i te anotau tahito i te haaputupu i te mahana matamua o te hebedoma ra, oia hoi to tatou Sabati, ma te haapao i te oroa, e ua na reira atoa tatou i te haapao, mai tei au i te parau, o tei na ô maira e: “E mea tia ia tairuru pinepine te ekalesia mai te amu i te pane e te uina ei haamana’oraa i te Fatu ia Iesu.” Buka Fafau 20: 75. —FARANI FULUMARE.

(E tuatihia mai teie parau.)

Te Parau Tuatapapa no
Iosepha Semita.

(TUATIRAA.)

PENE XXV.

MATAHITI 1836-37.

Te varua no te tamataraa. Ua faatiahia te hoê sotaiete haapao moni, aita râ i manuïa. E rave rahi tei taiva i te faaroo. Ua poro-haere-hia te Evanelia i Beritane. Tairi atura Satani ia Hebera C. Kimebela, aita râ i faaea te ohipa no te Fatu.

[MUA'E i te matahiti 1837, te tupu noa ra te varua no te tamataraa i rotopu i te mau taata no Amerika, a tamata noa'i ratou i te hoo mai i te mau mea, rau i te huru, i te maa moni iti roa, ei reira hoo faahou atu i te reira mau mea i te moni rahi, ia noaa ia ratou te moni apî, e ia riro oioi ratou ei mau taata ona. Ua hamani-apî-hia te pereoo auahi, e ua manuïa roa ïa, e no reira ua tamata noa te mau taata i te tarahu i te moni, ia tia ia ratou ia hoo mai i te tahi mau tufaa i roto i te mausotaiete pereoo auahi. Ua haamata te mau taata e rave rahi i te haere i te fenua maitai e te ruperupe, tei te pae i te tooa o te râ, i pihaiiho i te anavai ra, i Misisipi, e hoo ihora te tahi pae i te fenua rahi roa, mai te mana'o e, eita e mahia e faateiteihia te hoo, e e noaa ia ratou te moni rahi roa.

I te matahiti 1836, hinaaro ihora te Peropheta ra, o Iosepha, e te tahi atu mau taata paari no te Ekalesia, i te tauturu atu i te Feia Mo'a i te haapaoraa i to ratou moni, e ua faatiahia e ratou te hoê sotaiete haapao moni, i parauhia, te "Ketelani Paruru Sotaiete". I te haamataraa no te matahiti 1837, ua tere maitai roa te reira sotaiete, e aita te hoê peapea, mahia a'era râ, i roa ihora te mau taeae e rave rahi i taua varua tamataraa ra, e ua tamata taue noa ratou i te mau mea atoa. Ite ihora Iosepha e, no te reira huru

ohipa ino, eita e maoro e roohia'i ratou e te ati rahi e te peapea, e faaara noa'tura oia ia ratou, aita râ ratou i faaroo. Aita roa ona i hinaaro ia tauturu atu i te hoê mea parau-tia ore, e no reira faarue ê atura oia i taua sotaiete moni ra.

Ua tae i te hopea no taua mau tamataraa ra, i te matahiti 1837, a roohia'i te mau taata no Amerika e te ati rahi roa; no ite a'enei te peapea i te moni i rotopu i to Amerika mai te reira te huru. Ua mairi noa te hoo no te mau tufaa i roto i te mau sotaiete fenua, e te sotaiete pereoo auahi, e te mau huru sotaiete atoa hoi, i raro roa. Mâta'u ihora te tahi mau taata, e ua tamata noa ratou i te hoo atu i ta ratou mau tufaa. Ua mâta'u atoa râ te tahi atu mau taata, e aita ratou i hinaaro ia hoo mai i taua mau tufaa ra, e no reira e ati iti rahi to te mau taata, o tei mau i te mau tufaa i roto i te mau sotaiete. Aita i manuïa te mau sotaiete haapao moni e rave rahi, e aita atoa i manuïa te "Ketelani Paruru Sotaiete". Eiâ noa ihora te hoê taata, o Varene Parisa to'na i'oa, e piti ahuru tausani dara, no roto mai i taua sotaiete ra, e te tama'i noa'tura te tahi atu mau taata taiva, e te mau enemî no te Ekalesia ia'na. Tuu noa maira râ te mau taeae e rave rahi i ta ratou moni ia haapee atu i te mau tarahu no'na.

No taua mau tamataraa ra, e te mau mea manuïa ore, e te ati rahi, e rave rahi te mau taata tei taiva i te ekalesia, e riro ihora ratou ei mau enemî ino roa ia Iosepha. Ua faaara noa'tura oia ia ratou, area râ no to ratou hiaai i te moni, o tei tiahi atu i te Varua no te Atua, aita ratou i faaroo i ta'na ra mau a'oraa.

Ua î roa Ketelani i te mau diabolô, o tei tamata noa i te haamou i te Ekalesia. I taua taime ihora, faaue maira te Fatu ia Iosepha, ia parau atu ia Hebera C. Kimebela ia haere atu i te fenua ra, i Beritane, e poro-haere i te Evanelia i reira. I farîi vave mai Hebera i taua ohipa apî nei, no te mea e taata feaa ore noa oia i te rave i te ohipa maitai. Ia faaroo Oretoni Haede, raua o Viriadi Ritedi, i te parau

apî no to Hebera parau-raa-hia, ani atura raua ia tonono-atoa-hia raua, ei te mahana 13 no Tiunu, 1837, faarue atura ratou i Ketelani. Ua amuihia ratou e Ioane Godasona, e Isaasa Rusela, e Ioane Sinidera, e Iosepha Fieladina, ei te mahana 1 no Tiurai, faarue ana'e atura ratou i Niu Ioka.

Ua haere atura ratou na nia i te pahi ra o "Garika", i nia i te moana rahi, e ua tae atura ratou i Beritane ma te peapea ore. A haamairihia'i te tutau i te anavaira, i Mere-sei, i te poipoi, i te mahana 20 no Tiurai, ua tae mai te pahi, i parauhia "Amerika Apatoa". Hoê â mahana ta teie na pahi faarueraa i Niu Ioka, e ia haamata raua i to raua tere, parau atura te mau taata e, e noaa i te pahi o te o mua i te tae atu i Beritane, e hoê ahuru tausani dara, e ua riro te rê i te pahi tei hopoi atu i te mau orometua, oia hoi i te Garika. Ua haere oioi atu te tahi mau taeae i uta, na nia i te hoê boti nainai, e ia haafatata atu ratou i te fenua, ou'a puai atura o Hebera C. Kimebela i nia iho i te fenua no te hau Beritane, e o oia te taata matamua, o tei mau i te Autahu'araa, i te tiaraa i nia iho i te hoê fenua ê ite anotau hopea nei.

Tei te oire ra, i Livepola, te mau taeae i teie nei, haere vave atura râ ratou i te oire ra, i Peresatona, e toru ahuru maile te atea. Ia pou maira ratou no nia maira i te pereoo, te tia ihora ratou i pihaiiho i te hoê reva, e tei papaihia i nia iho i taua reva ra te parau e, "E manuïa noa te parau mau". Ua faakorona-apî-hia te arii vahine ra, o Vitoria, e te maitihia ra te tahi mau taata ei mau taata toroa no te hau, e no reira i hutihia'i teie nei reva ê, area râ te feruri noa ihora te mau taeae i nia iho i teie nei parau, no te mea i faaroo noa ratou i roto i to ratou mau aaui e, e tupu mauïa te reira.

I te poipoi, i te mahana Sabati, i te 23 no Tiurai, faaite atura te hoê orometua no te hoê haapaoraa ê, o Iakobo Fieladina to'na i'oa, i te mau taata i roto i to'na pureraa e, e a'o atu te tahi mau orometua, no ô mai i te fenua ra, i Amerika, ia ratou i roto i te reira fare pureraa, i te ahiahi no taua mahana ihora. E tuaana teie orometua no to tatou

taeae, o Iosepha Fieladina. Aita te mau taeae i ani atu i te reira, area ua mauruuru roa ratou ia'na. I taua ahiahi ihora, a'o atura Hebera C. Kimebela, e o Oretoni Haede, e i te pô atoa, ua haapaohia te hoê pureraa. Ua haapao-atoa-hia te hoê pureraa i te mahana toru i muri iho, ei reira opani roa'tura taua orometua ra i te mau opani no to'na ra fare pureraa i te mau taeae. Ua haaputuputu pinepine râ ratou i te mau utuafare, e aita i taffîhia te ohipa, e ia pau e hoê hebedoma, ua ineine e tooiva taata ia baptizohia.

Ua parauhia o Isaasa Rusela ia a'o atu i taua mahana ihora, area râ ia ara mai ona i te poipoi, mauui roa ihora ona i te mau demoni, e mana'o ihora ona e, e pohe roa ona mai te mea eita ona e faaora-vave-hia. Haere oioi atura oia ia Kimebela, raua o Haede, na Peresibutero, e faatahinu atura raua ia'na, e a na reira'iraua, ua tairi-matapô-roa-hia Hebera C. Kimebela e te hoê mana i ite-ore-hia, e mairi ihora oia i raro. Ua tuuhia ona i nia iho i te roi, e pure atura te mau taeae i te Atua, area no to'na mamae rahi, aita i tia ia'na ia taoto i raro; topa turi ihora oia, mai te pure atu i te Atua ia faaora mai ia'na.

Ua faarahia te mata no te mau Peresibutero, e ite ihora ratou i te hoê nuu rahi no te mau diabolô; e hoho'a taata to ratou, area râ mai te faaite noa maira i to ratou mau opuarāa ino, e te pohe-hae i roto i to ratou mau mata. Ua auau noa ratou i to ratou niho i roto i te hoê hora e te afa, e tahe noa maira te ufa i to ratou mau vaha, e tamata noa ihora ratou i te haafatata'tu i te mau taeae, area ua taffîhia ratou e te hoê mana i ite-ore-hia. Aita te mau Peresibutero i ite atu i te Fatu i taua taime ihora, i muri iti a'era râ, faaite atura te Peropheta ia ratou e, te paruru noa maira te Fatu ia ratou i te ino i taua taime ra. Noa'tu ta ratou mau tamatarāa puai, aita i tia i te mau varua iino ia faafîfi atu i te baptizorāa i te na taata e tooiva i taua poipoi Sabati ihora; e aita ratou i faafîfi atu i te ohipa no te Fatu i te fenua ra, i Beritane, no te mea ua tupu ruperupe noa taua ohipa ra, e ia haapaohia te amuirāa i te mahana fanaurāa no Iesu i muri iho, i te oire ra, i Peresatona, ua taiohia to te Ekalesia i Beritane e hoê tausani taata.—OLE PETESONA.

Te Mau Parau Api.

TE tama'i noa Italia e Turekia, e te huru, eita roa o Turekia e ví. Ua mana'ohia i teie nei, ua fatata taua tama'i ra i te hau noa.

I te 20 no Setepa, ua tae mai ia tatou e toopiti orometua apî, o Harry Gentry, e o Montrose Killpack to raua na i'oa. Te haapii nei raua i te re'o Tahiti, e te huru, eita e maoro e ite maitai raua i taua re'o ra.

I te tahi avae a'enei, ua faahoro te hoê taata tuiroo no Farani, o Legagneau, i to'na pahi reva, e hitu ahuru e ma hitu maile i te hora hoê. I te 17 no Setepa, ua tae taua taata ra i nia i to'na pahi e 5,600 metera i te teitei, oia tei hau i te teitei.

I te 12 no Atete, i teie nei matahiti, ua tupu te hoê aueue rahi fenua i te fenua ra, i Turekia. Aita i maoro taua aueueraa ra, e hoê afa minute rii noa iho, ua rahi roa'tu râ te ino. Mea rahi roa te taata i pohe roa, e ua tausani o tei haaparuparuhia. Te mau fare i tahatai, ua pararî ino roa, e ua parauhia e piti fare mori tei moe roa ia i raro i te miti.

E mea ri'ari'a roa te ohipa ôraa arahu i raro a'e i te fenua, e ua hanere te taata i pohe i taua ohipa ra i te mau matahiti atoa. I te fenua Purutia, ua tupu te hoê haruru rahi i roto i te hoê ôraa arahu, e e mea rahi te taata i haaparuparuhia. Ua parauhia e hoê maile e te afa te atea i tupu ai te haruru, e no reira aore i nehenehe ia tauturuhia te feia i roto i taua apoo ra. I te avae Setepa, ua pohe roa e ono taata i Utaha; ua mairi mai i nia iho ia ratou te aroaro o te hoê ôraa. I Farani, ua ura te hoê ôraa arahu i raro a'e i te fenua, e e 60 taata i pohe roa.

Ua parauhia e, o te hoê enemi rahi o te mau taata i te mau fenua atoa, o te rao ia ta tatou e ite nei. Te amu nei te rao i te mau mea faufaa atoa, e ua tau oia i nia i te mau ma'i hupehupe, ei reira e riro paha oia i te tau i nia iho i te maa ta tatou e amu. Ua parauhia e, o te rao nei ia te tumu rahi o te fiva aau e te tahi atu â mau ma'i iino. I te mau oire, i te fenua ra, i Amerika, te taparahi nei te mau taata i te rao e rave rahi, e ua afaihia'tu i nia i te faito. Te imi nei ratou i te ravea ia faaore i te rao, o te tumu ia o te faarahi i te mau huru ma'i atoa ra.

Tei te 13 no Setepa te Matahiti Apî no te ati Iuda, e mai tei au i to ratou taioraa, ua pau i teie nei e 5,673 matahiti mai te hamaniraa i te ao nei, e tae roa mai i teie nei. Te farii nei te ati Iuda e 1,656 matahiti mai te hamaniraa i te ao, e tae roa mai i te deluvi; e ia tae roa mai ia Iesu e 4,000 matahiti. Mai tei au i te taioraa a to Samaria, ua pau e 1,307 matahiti e tae roa i te deluvi. Ua rau te huru o te mau taioraa, e ua parauhia e piti hanere huru taioraa, huru ê te tahi i te tahi. Mai tei au i te taioraa o te tatou Bibilia nei, ua pau e 4,004 matahiti ia fanau mai te Mesia.

E faarahihia te buka pae o Te Heheuraa Apî, e amui-atoa-hia te vea no Atopa, e no Novema, e no Ditema i roto i te buka hoê. I te matahiti apî e haamatahia te buka ono, ei reira ua papu te haereraa, oia hoi e oti te hoê buka i te matahiti hoê.

Ua faahua hauti noa e toopiti tamarî i te ohipa "cowboy", e ua rave raua i te mau peu o te "cowboy", oia hoi te taura marei, e te pupuhi pute. Ua hauti noa raua, e ua faatano te tahi i to'na pupuhi i te tahi, haruru ihora te pupuhi e ua pohe roa te hoê tamaiti. Aita roa te hoê ohipa ino i opuahia, aita râ raua i ite e, e ofai tei i roto i taua pupuhi ra.

I te vea no Setepa, ua faaitehia te poheraa o te Emepera no Iapone, i te 30 no Tiurai i pohe ai. O oia te 121 no te mau Emepera o taua fenua, e ua faatere oia i taua hau e 45 o te matahiti. I teie nei ua monohia oia e ta'na tamaiti toru, o Yoshihito, e e 33 matahiti to te Emepera apî. E taata haapiihia oia, e ua ite papu oia i te mau re'o papaa, te re'o Farani, te re'o Purutia, e te re'o Beritane. I teie mau matahiti i pau a'enei, ua mana'ohia e, e mau taata faaroo ore te mau taata Iapone. I te pô i pohe ai te Emepera, ua tairuru i rapae au i te aua o te Emepera, i te mahora o te hau, e 100,000 taata, e ua parahi ratou i reira e ao noa'tu. Aita roa te hoê maniania i rotopu ia ratou, maori râ te parau rii mârû o to ratou mau pureraa. Ua papai ratou i to ratou mau pure i nia i te mau reva, e ua huti i nia roa'e, ia iteahia e to ratou mau atua. Ua papai atoa ratou i te pure i nia i te pauma, haapee atura i nia roa i te reva. Ua i roa te mau hiero e te mau fare putuputuraa, i te ao e te pô, e ua pure noa te mau taata ia faa-orahia to ratou Emepera herehia. Ua tia e toopae taata i mua i te hoê fata, e ua pûpû ratou i te hoê pure i papaihia i to ratou iho toto. Ua haatafata te hoê potii i te hoê fata, tapu ihora i to'na rouru nehenehe roa, ta-nina atura i te auahi ei tusia. Ua iriti te tahi pae i to ratou ahu, e horo tahaa noa'tura ratou i te tahi hiero e te tahi hiero; ia tae ratou i mua i te fata i te hiero, ua tito te mau tahu'a i te pape toetoe i nia i to ratou tino i vai tahaa, ia tamâhia ratou, ia faatiamâ-roa-hia ratou, ia manuïa to ratou pure, e ia faaorahia to ratou Emepera. I te pô i pohe ai te Emepera, ua hutihia te hoê mori mata'i i mua i te haamaramarama o to'na piha, ei faa-itera e, te ora nei oia, e i te hora i pohe ai oia, ei reira ua tinaihia taua mori ra. E moni rahi roa tei pau i te hunaraa i te Emepera i pohe, e ua parauhia e taea te reira e piti hanere tausani dara.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.